

आकाशवाणी जयपुर-अजमेर

दिनांक 20.10.2024 समय: 18.45 बजे

- प्रदेशभर मांय अखण्ड सौभाग्य रो प्रतीक करवा चौथ रो तिंवार श्रद्धा अर उछाव रे साथे मनायो जा रियो है।
- राज्य रा कई जिलां मांय दिव्यांगजन ने सरकारी योजनावां रो फायदो दिलाबा खातर विशेष शिविर लगाया गया।
- धौलपुर जिला मांय बाड़ी कस्बे रे कने सड़क हादसा मांय 12 लोगां री मौत-प्रधानमंत्री नरेन्द्र मोदी हादसा रा शिकार लोगां खातर दुख जतायो।
- प्रदेश मांय कई ठोरा माथे मेह बरसबा अर ओला पड़बा सू मौसम रो मिजाज बदल्यो।

000

अखण्ड सौभाग्य रो प्रतीक करवा चौथ रो तिंवार प्रदेशभर मांय श्रद्धा अर उछाव रे साथे मनायो जा रियो है। महिलावां 16 श्रृंगार कर चौथ माता की पूजा अर्चना कर परिवार मांय सुख समृद्धि अर पति री लंबी उमर री कामना कर री है। आज चन्द्रमा ने अर्ध्य देर महिलावां व्रत खोलेला। इण मौके चौथ माता मिंदिरां मांय श्रद्धालु, माता रा दर्शन खातर पूग रिया है। सवाईमाधोपुर जिला रा चौथ का बरवाड़ा मांय चौथ माता मिंदर अर रणथम्भौर दुर्ग रा त्रिनेत्र गणेश मिंदर मांय सुंवारे सू ही श्रद्धालुवां रो तांतो लाग्यो है। बारां, कोटा अर झालावाड़ सहित दूजी जिलां रा बाजारां मांय खरीदारां री चहल-पहल निजर आ री है। बढीने भरतपुर मांय भी अखण्ड सौभाग्य रो तिंवार करवा चौथ धूमधाम सू मनायो जा रियो है। बत्ती जाणकारी म्हांका खबरनवीस सू –

.....

राष्ट्रपति द्रौपदी मुर्मु, मंगलवार ने नई दिल्ली मांय पांचवां राष्ट्रीय जल पुरस्कार देवेला। केंद्रीय जल शक्ति मंत्रालय नौ श्रेणियों मांय 38 विजेतावां रो ऐलान कर्यो। इण मांय सर्वश्रेष्ठ राज्य, जिला, ग्राम पंचायत, शहरी स्थानीय निकाय, जल प्रयोक्ता संघ अर सिविल सोसाइटी री श्रेणियां शामिल हैं। सर्वश्रेष्ठ राज्य री श्रेणी मांय ओडिशा पैली ठोर माथे रियो। इण मांय हर एक विजेता ने प्रशस्ति पत्र अर ट्रॉफी रे साथे नकद पुरस्कार दिया जावेला। बतायो जावे है के केन्द्र सरकार, जल प्रबंधन अर जल संरक्षण रा बारा मांय जाग जगाबा खातर राष्ट्रीय स्तर माथेएक बढो अभियान चला री है। राष्ट्रीय जल पुरस्कारां खातर देशभर सू इण भांत रा व्याक्ति अर संगठन चुण्या जावे है, जो सरकार रा जल समृद्ध भारत रा लक्ष्य ने हासिल करबा री दिशा मांय काम करे है।

000

प्रधानमंत्री नरेन्द्र मोदी ने कया के सिविल सेवकां ने नई तकनीकी विकास रे साथे खुद ने अपडेट राखबा री जरूरत है, जिण सू वे टेम रे साथे चाल सके। काल नई दिल्ली मांय डॉ. अंबेडकर अंतर्राष्ट्रीय केंद्र मांय 'कर्मयोगी सप्ताह' री सुरुआत करता थकां प्रधानमंत्री कया के मिशन कर्मयोगी इण मांय मददगार साबित व्हे सके है। प्रधानमंत्री कया के मिशन कर्मयोगी रे जरिए सरकार रो लक्ष्य देश रा विकास खातर मानव संसाधन तैयार करना है। वे इण बातां माथे जोर दिया के राष्ट्रीय शिक्षण सप्ताह रे दौरान नई सीख अर अनुभव, कार्य प्रणाली ने और बेहतर बणावेला। इण सू बरस 2047 ताई भारत विकास री नई ऊंचाई ताई पूग सकेला। बतायो जावे है के मिशन कर्मयोगी री सुरुआत सितम्बर 2020 मांय करी गई ही। इण मांय वैश्विक परिप्रेक्ष्य रे साथे भारतीय लोकाचार माथे आधारित भविष्य खातर तैयार सिविल सेवा री कल्पना करी गई ही।

000

प्रदेश रा न्यारा-न्यारा जिलां मांय दिव्यांगजन ने सरकार री योजनावां रो फायदो दिलाबा रा उद्देश्य सू खास शिविर राख्या जा रिया है। इणी कड़ी मांय बारा जिलां मांय "सशक्त बारां, प्रगति को शक्ति" अभियान रे तैत आज अटरू पंचायत समिति मांय शिविर लगाया गया। इण मांय बड़ी संख्या मांय

दिव्यांगजन भाग लीना। इणी भांत बाड़मेर जिला प्रशासन री कानी सूं भी जिलाभर मांय शिविर राख्या जा रिया है। बत्ती जाणकारी म्हांका खबरनवीस सूं –

000

धौलपुर जिला मांय बाड़ी कस्बा रे कने राष्ट्रीय राजमार्ग माथे काल रात एक सड़क हादसा मांय 5 टाबरां समेत 12 लोगां री मौत व्हेगी। या घटना एक स्लीपर बस अर ऑटो-रिक्शा री टक्कर सूं व्ही। सगळा पीड़ित एक शादी मांय भाग ले र लौट रिया हा। दुर्घटना मांय बस चालक अर कंडक्टर गंभीर रूप उं घायल व्हे ग्या, वां ने धौलपुर रा जिला सफाखाना मांय भर्ती करायो ग्यो है।

प्रधानमंत्री नरेंद्र मोदी हादसे रा शिकार लोगां री मौत माथे दुख जताया है। सोशल मीडिया पोस्ट मांय श्री मोदी कया के राज्य सरकार री निगरानी मांय स्थानीय प्रशासन पीड़ितां री हर भांत री मदद करेला। वणां घायलां रे बेगी ही ठीक होबा री कामना करी।

श्री मोदी, प्रधानमंत्री राष्ट्रीय राहत कोष सूं मृतकां रा घराळा ने दो-दो लाख अर घायलां ने पचास-पचास हजार रुपया देबा रो ऐलान कर्यो। राज्यपाल हरिभाऊ बागडे अर मुख्यमंत्री भजनलाल शर्मा हादसा माथे दुख जताया।

000

केंद्रीय ग्रामीण विकास मंत्री शिवराज सिंह चौहान, काल नई दिल्ली मांय शहरी भू-रिकॉर्ड खातर सर्वेक्षण-पुनः सर्वेक्षण मांय आधुनिक प्रौद्योगिकी रा बारा मांय अंतर्राष्ट्रीय कार्यशाला रो उदघाटन करेला। इण कार्यशाला रो मकसद शहरी भू-रिकॉर्ड आधुनिकीकरण मांय वैश्विक सर्वश्रेष्ठ पद्धतियां ने प्रदर्शित करनो, अनुकूल तकनीकी समाधान प्रस्तुत करनो अर चुनिंदा शहरी हलकां खातर प्रायोगिकी परियोजना तैयार करनो है। कार्यशाला मांय मानकीकरण री कमी, डाटा सुरक्षा अर हितधारकां खातर क्षमता निर्माण, जैडी चुनौतियां माथे भी विचार कर्या जावेला। दो दिन री इण कार्यशाला रो लक्ष्य केंद्र सरकार रा मंत्रालय अर महकमा, राज्य अर केंद्रशासित प्रदेशां रा राजस्व अर शहरी विकास सचिव, अंतर्राष्ट्रीय विशेषज्ञ अर प्रौद्योगिकी प्रदातावां समेत संबंधित हितधारकां ने एक मंच माथे लागो है।

000

केन्द्र सरकार कानी उं पाली, प्राकृत, मराठी, असमिया अर बांग्ला भाषा ने शास्त्रीय भाषा रो दर्जो दिया जाबा माथे इण भाषावां रा चयनित विद्वान सरकार रो आभार जताया। केंद्रीय शिक्षा मंत्री धर्मेन्द्र प्रधान सूं मुलाकात करबा वाळा पांच लोगां मांय प्राकृत भाषा री ओर सूं जयपुर रा प्रोफेसर धर्मचंद जैन भी शामिल हा। जैन, केन्द्रीय मंत्री सूं मुलाकात मांय प्राकृत भाषा रो देशभर मांय प्रचार-प्रसार करबा, इण रो महत्व थापित करबा अर इण मांय निहित भारतीय ज्ञान परम्परा ने उजागर करबा अर लोगां मांय इण भाषा ने सीखबा खातर जाग जगाबा रा बारा मांय चर्चा करी अर इण फैसला खातिर प्रधानमंत्री नरेन्द्र मोदी रो आभार जताया।

000

दीपावली सूं ठीक पैली केंद्र सरकार काश्तकारां ने फायदो पुगाबा खातर बड़ो फैसलो लेता थकां रबी फसलां रा कम उं कम समर्थन मूल्य मांय बढ़ोतरी करी है। केन्द्रीय कैबिनेट रा इण फैसला सूं शाहपुरा जिला रा काश्तकार खुशी जाहिर करी है। किसान उदयलाल सिरोठा अर द्वारका प्रसाद किसान हितैषी फैसला बाबत केन्द्र सरकार रो आभार जताया है।

000

प्रदेश मांय बत्ती ठोरा माथे दिन मांय तेज गर्मी अर सुंवारे अर सिंज्या ने हल्की सर्दी रो असर देख्यो जा रियो है। दौसा जिला मांय आज दोपहर पाछे कई ठोरा मांथे मेह बरस्यो। बठीने सिकराय हल्का मांय कुछ ठोरां माथे ओला पड़्या। जिला मांय रबी री बुवाई सूं पैली व्ही बिरखा सूं काश्तकारां ने फायदा व्हेला।

श्रीगंगानगर मांय कई ठोरा माथे हल्को मेह बरसा रे साथे ओला पड़्या। भरतपुर मांय भी सुंवारे सूं बादल छाया रिया अठे कुछेक ठोरा माथे बूदाबांदी होबा सूं लोगां ने गर्मी सूं थोड़ी राहत मिली है। मौसम केन्द्र जयपुर रे मुजब आज धौलपुर, करौली अर दौसा जिलां मांय कुछेक ठोरा माथे मेघ गरजबा रे साथे हल्की सूं मध्यम बारिश व्हे सके है। बठीने टोंक, भरतपुर, जयपुर, अजमेर, सीकर, अलवर, सवाईमाधोपुर, कोटा, जैसलमेर, बाड़मेर अर जालौर जिलां मांय कठे-कठे मेह बरस सके है।

000

शाहपुरा जिला मुख्यालय माथे राष्ट्रीय स्वयंसेवक संघ री कानी सूं आज पथ संचलन काड्यो ग्यो। इण दौरान रास्ता मांय केई ठोरा माथे लोग फूलां री बरसात कर संचलन रो स्वागत कर्या। सुंवारे राजकीय उच्च माध्यमिक विद्यालय सूं सरु हो र शहर रा खास रास्ता सूं होता व्हीया पथ संचलन काड्यो ग्यो।